

**ԼՈՍ ԱՆՃԷԼՈՍԻ ԿԵԴՐՈՆԱԿԱՆՑԻՆԵՐԸ ՏՕՆԵՑԻՆ
ԻՐԵՆՑ ՎԱՐԺԱՐԱՆԻ ՀԻՄՆԱԴՐՈՒԹԵԱՆ ԸՅՈՐԴ
ՏԱՐԵԴԱՐՁԸ ԵՒ ԲԱԺԱԿ ԲԱՐՁՐԱՑՈՒՑԻՆ
ԱԶԳԱՅԻՆ ԿԵԴՐՈՆԱԿԱՆ ՎԱՐԺԱՐԱՆԻ ԿԵՆԱՑ**

Գրեց՝ Միսնն Աճիլաչօղլու

Լոս Անճելլոսի Պոլսահայ Միության Կեդրոնական Սանուց Յանձնախումբի կազմակերպությամբ, Լոս Անճելլոսի կեդրոնականցիները Յ Դեկտեմբեր 2016 Շաբաթ գիշեր մեկտեղուելով ճաշկերոյթի սեղաններու շուրջ յիշատակելի օր մը անցուցին ինչպէս նաեւ տօնեցին իրենց շատ սիրելի դպրոց՝ Ազգային Կեդրոնական Վարժարանի հիմնադրութեան 130 ամեակը բաժակ բարձրացնելով անոր կենացը:

Այս հաւաքոյթը տեղի ունեցաւ Պոլսահայ Միութեան Գրիգոր Եւ Աւետ Քիրքօղլու սրահին մէջ 130 հոգիներու ներկայութեամբ:

Քանի որ 2016 թուականը կը զուգադիպի Ազգային Կեդրոնական Վարժարանի հիմնադրութեան 130րդ տարեդարձին, Կեդրոնական Սանուց Յանձնախումբի Վարչութիւնը, գլխաւորութեամբ Ատենապետ Յակոբ Ծերունեանի, փափաքեցաւ այս տարուայ «Բաժակի Օր»ը տօնել աւելի փառաւոր հանդիսութեամբ:

Հակառակ որ Յանձնախումբին ատենապետն էր, օրուան հանդիսավարութեան պաշտօնը, ինչպէս միշտ, ստանձնած էր Պր. Յակոբ Ծերունեան որ իր սրամիտ արտայայտութիւններով խանդավառեց ներկաները եւ փայլք աւելցուց գիշերուան ճաշկերոյթին:

Պր. Ծերունեան ողջունելէ ետք բոլոր նախկին Կեդրոնականցիներն ու համակիրները, զանոնք հրաւիրեց մէկ վայրկեան յոտնկայս լռութեամբ յարգելու յիշատակը՝ Վարժարանի Հիմնադիր Երջանկայիշատակ մեծանուն կրթասէր Պատրիարք Ներսէս Արք. Վարժապետեանի, որուն այս տարի ծննդեան 180րդ տարեդարձն է, Պոլիսէն մինչեւ Լոս Անճելլոս մեզմէ անդարձ բաժնուած հիմնադիրներուն, բարերարներուն, տնօրէններուն, խնամակալներուն, ուսուցիչ ու ուսուցչուհիներուն, աշակերտ ու աշակերտուհիներուն եւ պաշտօնեաներուն: Ծերունեան շնորհակալութիւն յայտնեց կարգ մը հանգուցեալ կեդրոնականցիներուն կողակիցներուն եւ զաւակներուն որոնք բերած էին իրենց ներկայութիւնը այս գիշերուան յատուկ ճաշկերոյթին:

Ատենապետ Յակոբ Ծերունեան ներկաներուն ծանօթացուց յանձնախումբի իր ընկերները որոնք էին՝ փոխ ատենապետ Աւետիս Թէքօլեան, ատենադպիր Հրանդ Ռաքրճեան, զանձապահ Ժիրայր Արսլանեան, խորհուրդատուներ՝ Սահակ Թունա, Հերման Չէլիք եւ Կիլպէնկ Մովսէսեան:

Յանձնախումբին որոշումով, իրենց յարգանքը ցուցաբերելու համար յուշանուէրներ յանձնեց այն կեդրոնականցիներուն որոնք Լոս Անճելլոսի մէջ Կեդրոնական Սանուց Յանձնախումբի կազմութեան 1978 թուականէն մինչեւ այսօր Յ8 տարիներ, իբրեւ յանձնախումբի նախկին ատենապետ, բեղուն եւ նուիրական ծառայութիւնը ունեցած էին ինչպէս՝ Արէտ Օգութան Վարժապետեան, Տրդ. Արթօ Էրսան Խաչերեան, Ասատուր Չիլինկիրեան, հանգուցեալ Աւետիս Գավճըօղլուի տիկինը Էրիքա Գավճըօղլու, Աւետիս Թէքօլեան, Յակոբ Ծերունեան, Յովսէփ Թօքթաթ, Միրիճան Կիրեղեան, Տրթ. Յովհաննէս Գուլակ Աւետիքեան, հանգուցեալ Օննիկ Պալեանի զաւակը Վարդան Պալեան, Սահակ Թունա, Սարգիս Սէթեան, Միսնն Աճիլաչօղլու եւ

Երուանդ Տօնիկեան: Նոյնպէս յուշանուէրով մը գնահատուեցաւ իբրեւ համակիր Եղիա Քէօշէեան որ երկար տարիներ եւ մինչեւ այսօր, յանձնախումբի ձեռնարկներուն, սիրայօժար բեմայարդարանքի եւ սրահի զարդարանքի աշխատանքը կը տանէր:

Գեղարուեստական բաժնին սիրայօժար իր ներկայութիւնը բերաւ Խաչատուրեան Դ.Դ. Երզնայի Փոյս Ղեկավարուի Սօփրանօ Ալենոյշ Եղնազար, ընկերակցութեամբ հանրաժանօթ դաշնակահար Յովիկ Ոսկանեանի, երգեց «Կարսի Վարդ»ը, «Լեռներ չայրենի»ն, «Այնպէս Ուզում Եմ» եւ «Երեւան»ը խանդավարելով ներկաները:

Պոլսահայ Միութեան Հոգաբարձութեան Ատենապետ Իրաւաբան Էտփին Մինասեան բեմ բարձրանալով նախ շնորհաւորեց Կեդրոնական Ազգային Վարժարանի հիմնադրութեան 130ամեակը ինչպէս նաեւ յանձնախումբի նախկին եւ ներկայ անդամները որոնք ամէն տարի կը կազմակերպեն ամառային բաժակի պահը եւ իրենց յարգանքի տուրքը կը մատուցանեն սիրելի վարժարանին հանդէպ:

Այս առթիւ Մինասեան Պոլսահայ Միութեան անունով ամառային դարձած կրծքանշաններ գետնէն այն անդամներուն որոնք տարիներ ծառայութիւն տարած էին Պոլսահայ Միութենէն ներս ինչպէս Սեթ Պուլանըքեան 10 տարի, Տէր եւ Տիկին Միսոն եւ Անահիտ Գօճաեաններ 20 տարի, Տրթ. Մարք Քէօշքէր 20 տարի, Կարպիս Սարաֆեան 30 տարի եւ Արամ Ակինեան 30 տարի (բացակայ էին Տկն. Տիանա Ճանիկ եւ Պրն. Զրաչ Սեթեան): Մինասեան շնորհակալութիւն յայտնեց Սարօ եւ Ռաֆֆի Մարութեան եղբայրներուն որոնք ինչպէս ամէն տարի այս տարի եւս սիրայօժար պատրաստած էին ոսկեայ կրծքանշանները:

Ատենապետ եւ Հանդիսավար Յակոբ Ծերունեան դարձեալ բեմ բարձրանալով ընթերցեց Պոլսոյ Ազգային Կեդրոնական Վարժարանի Տնօրէնուի Տկն. Միլվա Գույումճեանի կողմէ դրկուած նամակը: Տիկին Գույումճեան-Մարկոսեան իր նամակին մէջ կը շնորհաւորէր աշխատակազմի Կեդրոնականացիներէն Լոս Անճելըսի Կեդրոնականացիներու «Բաժակի Պահը»: Ան կը խոնարհէր կեդրոնականացիներուն մղոններ հեռաւորութեան վրայ ցուցաբերած այնքան զօրաւոր կամքին, զողողութեան նկատմամբ՝ զորս կը ցուցաբերեն հակառակ մեծ քաղաքի դժուարին պայմաններուն: Տիկին գույումճեան տեղեկութիւններ կուտար նաեւ վարժարանի աշակերտութեան եւ պիտաճէին մասին: Այսպէս կը նշուէր որ Կեդրոնական Վարժարանը ունի 128 աղջիկ եւ 100 մանչ ընդհանուր 228 աշակերտ: Կը շեշտուէր նաեւ որ վարժարանի մէջ կը պաշտօնավարեն 39 ուսուցիչ ու ուսուցչուհիներ, որոնք ճիգ կը վատնեն լաւագոյն ուսումը ջամբելու աշակերտներուն: 2016ին աշակերտութեան % 95 ը մուտք գործած է համալսարաններէն ներս:

Հասած էր բաժակի պահը երբ Պր. Ծերունեան հրաւիրեց երիցագոյն կեդրոնականացի Տիկին Այտա Ունանեանը (1944-1945 ի շրջանաւարտ) եւ Պր. Յակոբ Ծերունեանը (1954-1955 ի շրջանաւարտ) ու կրտսերագոյն կեդրոնականացի Պր. Գարնիկ Օհանեանը (1974-1975 ի շրջանաւարտ), որոնք միասնաբար, ներկաներուն ալ մասնակցութեամբ իրենց բաժակները բարձրացուցին Կեդրոնականի կենաց, բացազանչելով «Ապրի՛ Կեդրոնականը, Ապրի՛ Կեդրոնականացին»:

Բեմ բարձրացաւ Տիկին Ալին Տօնիկեան որ շնորհաւորելէ յետոյ բոլոր կեդրոնականացիները իր հպարտութիւնը զգաց կեդրոնականացիի մը կողակիցը ըլլալուն եւ երախտագիտութեան զգացումներով մօտեցաւ Պատրիարք Ներսէս Վարժապետեանի առաքելութեանց: Ան ընթերցեց Յակոբ Ծերունեանի Կեդրոնականի մասին գրի առնուած մէկ բանաստեղծութիւնը:

Իսկ Նիլտա Աճիլաչօղլու եւ շնորհատրելով Կեդրոնականցիներու բաժակի պահը եւ յարգանքով խոնարհելով Երջանկայիշատակ Ներսէս Պատրիարք Վարժապետեանի յիշատակին առջեւ ընթերցեց Պոլսոյ Մարմարա Օրաթերթէն քաղուած Սիմոն Մելիքսէթեանի «Նայր Մեր» ֆանդազի բանաստեղծութիւնը տալով նաեւ բանաստեղծին եւ բանաստեղծութեան պատմականը գրի առնուած Գագիկ Բատիկեանի կողմէ:

Ծերունեան Պոլսոյ Ազգային Կեդրոնական Վարժարանի ամփոփ պատմականը ներկաներուն փոխանցելէ յետոյ յանձնախումբի անդամներուն կողմէ հատուեցաւ ԽՅՕրդ տարեդարձի կարկանդակը:

Միացեալ Խաչատուրեան Դ.Դ. Երգչախումբի անդամներէն տէր եւ տիկին Պօղոս եւ Ժանա Խաչատուրեան ամուլը հայերէն ժողովրդական եւ իտալերէն երգերով խանդավառեցին ներկաները արժանանալով բարձր գնահատանքի:

Ծերունեան մասնաւոր շնորհակարութիւն յայտնեց բոլոր անոնց որոնք ոչ մէկ ջանք խնայած էին այս հաւաքոյթը կեանքի կոչելու համար եւ անոնց որոնք նուիրած էին յուշանուէրները, կարկանդակի եւ մեծ մասամբ համեղ ճաշերու զովացուցիչներու նիւթական արժէքները:

Գիշերուան պատշաճ յայտագրին յաջորդեց շատ գեղեցիկ ու տպաւորիչ երաժշտութիւն մը գոր մեկնաբանեց Արշակ Խնդիրեան:

Կեդրոնականցիները խանդավառ ու տաքութեամբ մթնոլորտի մէջ մինչեւ գիշերուան յառաջացեալ ժամերը կը խօսակցէին իրար հետ եւ իրենց կարօտը կ'առնէին մէկզմէկէ: Անոնց աչքերուն մէջ գոհունակութեան փայլքը կը ցոլանար, երբ կ'ոգեկոչէին անցեալի իրենց յիշատակները:

Գիշերուան յառաջացեալ ժամերուն, ներկաները լաւ տպաւորութիւններով ակամայ բաժնուեցան սրահէն, իրենց գնահատանքը յայտնելով յանձնախումբի անդամներուն: